

## Svelz e dordei

Un socialist che, tra une robe e chê âltre al ven a tirâ une mesade che fasarès gole a un biel grum di capitalisc', nus à dât, a noâltris regjonalisc', il titul di "ingenui". Par furlan cheste peraule si podares voltâle cun tantis âltris, dutis pitost sporcjutis : 'o sielzin, par rispjet la plui nere: dordei.

E, cu la nestre solite obietivitât, 'o disìn dal moment ch'al à reson. (No jè la prime volte ch'j dìn reson!). Noâltris 'o sin dordei. Dordei, parcè che no vin mai lecadis lis scarpis a un gran partît fin al moment di gaspâ une buine grepie, par voltâj lis spàlis l'indoman e jentrâ in tun âltri partît, indulà che par mancjanze di esponenz za in viste, la scjale di lâ in sù 'e je plui curte. Dordei, parcè che 'o vin molade une pidade a dute la retoriche de torze furlane, impiade su la scuretât barbariche oltrimontane: retoriche stupide e false, ma preziose e ben retribuide dal Ufizi "Zone di Confine".

Dordei parcè che, plui di une volte 'o vin fat il cont dai vantaz che il stât talian al à puartâz al Friûl dopo dal '66, e lu vin cjatât disastrôs: miserie, emigrazion e terons; indulà che s'o lu vèssin cjatât pusitîf, si varessin uadagnadis lis simpatîis di un grum di int "furbe". Dordei, parcè che 'o vin olsât criticâ l'intuizion dai martars dal Risorgiment tal imbastî il plui anacronistic ordenament Statâl ch'al sedi stât metût adun tal secul passât; indulà che dal paron si à simpri di dî ben. Dordei, parcè che 'o si vin metûz a propugna une cause che cjate ogni dì avversaris plui rabeôs e risulîtz tra lis gramulis plui formidabilis d'Italie: une cause che no nus à puartâz, e no nus puartarâ, su nissun scagn parlamentâr, in nissune presidenze ben pajade, in nissune carriere pulitiche, insumis a nissun risultât pal tacuin e pal budiel.

Dordei, parcè che no vin pleât il fîl de schene a nissune forme di adatament, a nissune voltade di bandiere, a nissun mercjât di prinzipis, a nissun di chêi gambiamenz di gabane che ai "sveli" a puàrtin tanc' vantaz. Dordei, parcè ch'o crodìn ancjemò, par cheste strade cence mangjadòriis, di podé fâ alc par chel biât Friûl, che par tanc' âltris al è nome une mangjatorie. Tre voltis, dôs voltis dordei. Ma no marionetis. Ma no tant dordei di crodi a une sole di chês peraulis di passion pe salvezze dal Friûl, che i furbos di ogni partît a' fasin stampà sui gjornai o che a' ripetin tai comizis, par chê âltre categorie di dordei che vòtin par lôr: chei furbos che, dopo di vê scombatût par salvâ l'Italie, par salvâ Vignesie, par salvâ Triest, a' cjàtin ancjemò flât di butâ par salvâ il Friûl.

Patrie dal Friûl, n. 4 15/28 di Fevrâr 1950